

xx. december 2015

Inatsisartut suleriaasianni § 37 naapertorlugu matumuuna Naalakkersuisunut imaattunik apeqquteqaatinik saqqummiussivunga:

**Apeqqut:**

- 1. Namminersorlutik Oqartussat ulloq unnuarlu paaqqinnittarfiini sulisut atugarissaarnerat pillugu Naalakkersuisut misissuititsinikuuppat?**
- 2. Taamaangippat: Naalakkersuisut siunissami ulloq unnuarlu paaqqinnittarfinni sulisut atugarissaarnerat pillugu misissuititsiniarpat?**
- 3. Namminersornerusut ulloq unnuarlu paaqqinnittarfiini najugaqartut ilaquataasalu naammaginnissimaarnerannut Naalakkersuisut misissuititsinikuuppat?**
- 4. Taamaangippat: Naalakkersuisut siunissaq eqqarsaatigalugu ulloq unnuarlu paaqqinnittarfinni najugaqartut ilaquataasalu naammaginnissimaarnerannut misissuititsisamaarpat?**

Inatsisartuni ilaasortaq Laura Tàunâjik, Siumut

**Tungavilersuineq:**

Namminersornerusut ulloq unnuarlu paaqqinnittarfiutaani atukkat pitsaasuullutillu toqqissisimanarnissaat qanoq ililluta qulakkeersinnaavarput? Apeqqut taamaattoq maannakkorpiaq immikkut soqutigisaraara.

Ulloq unnuarlu paaqqinnittarfinni najugaqartut amerlanertigut sanngiitsuupput toqqissisimanissamik ingerlalluarnissamillu avatangiiseqarnissartik pisariaqartillugu. Paaqqinnittarfinni ataasiakkaani pisortaat pingaarnerusumik tamanna akisussaaffigivaat. Paaqqinnittarfinni ataasiakkaani pisortaat aamma akisussaaffigaat sulisunut atugassarititaasut naammaginarnissaat aammalu suliffimmi avatangiisit ajunngitsuunissaat.

Ilaqutariinnermut departementi soorunami aamma ullukut unnuakkullu paaqqinnittarfinnut nakkutiginnittussaataavoq, ajornartorsiortoqartoq paasineqaraangat pisariaqarfiatigut akulerteriatarsinnaalluni. Apeqqut uaniinneruvoq, qanoq ililluta qulakkeersinnaanerlutigu, ajornartorsiutit departementimut saqqummiunneqareeraangata, piffissaagallartillugu suliarineqarnissaat, ajornartorsiut allivallalertinnagu.

Sulisumut ajornakusoorsinnaavoq suliffigisami ajornartorsiutit pillugit isornartorsiuilluni saqqummeeriataarnissaq, minnerunngitsumik pisortaasoq kukkuluttorsimappat. Taamatuttaaq ulloq unnuarlu paaqqinnittarfinni najugaqartut ilaqutaasullu ajornartorsiutit tikkuartussallugit tunuarsi-maarsinnaasarput, sulisunut ajunnginerpaamik attaveqaqatigiinnertik attatiinnarumallugu, sulisummi pinngitsoorsinnaanngilaat.

Matumani eqqarsaatigaara, sulisut atugarissaarnerannik misissuinerit aammalu najugaqartunut ilaqutaasunullu naammaginnissimaarnermik misissuinerit sakkutut atussaallugu tulluarlunilu naluujusinnaasoq – misissuinerimmi pineqartut atugassarititaasunut misissuinerit aammalu naammaginnissimaarnermik misissuinerit isertortumik akineqarsinnaammata.